

Siunnersuut uunga: Meeqqanik pinerliisimanginnermut uppersaatinik piunasaqaateqartussaataaneq pillugu Inatsisartut inatsisaata allanngortinnera pillugu Inatsisartut inatsisaat.

(Ilinniartitaanermit, Kultureqarnermit, Ilisimatusarnermit, Ilageeqarnermullu Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit matumuuna Meeqqanik pinerliisimanginnermut uppersaatinik piunasaqaateqartussaataaneq pillugu Inatsisartut inatsisaata allanngortinnera pillugu Inatsisartut inatsisissaattut siunnersuut saqqummiuppara.

Takuneqarsinnaasutut meeqqanik pinerliisimanginnermut uppersaatinik pillugit inatsisip atuuttup allanngortinnissaa, taassumalu siunertaraa, inuit meeqqanik kinguaassiuutitigut innarliisimasut atorfinnut suliffinnulluunniit toqqaannartumik meeqqanut attuumassuteqarfiusunut atorfinnissaasa sulilernissaasaluunniit pinaveersarneqarnissaat.

Inatsisissatut siunnersuutit matuma siunertaraa meeqqanik pinerliisimanginnermut uppersaatinik atuuffiisa annertusinissaat, taamaalillunilu meeqqanik kinguaassiuutitigut atornerluisarnerup pinaveersaartinneqarnerani suliniutit nukittorsarneqarnerunissaannut tunngavissiiinissaq.

Siunnersuutit ajornarunnaartissavaa, inunnut sulinerminnut atatillugu meeqqat 15-it inorlugit ukiullit akornanniittartunut, taamaalillutillu meeqqanut 15-it inorlugit ukiulinnut toqqaannartumik attaveqarsinnaasunut tunngatilluguttaaq meeqqanik pinerliisimanginnermut uppersaammik piniarsinnaanissaq, taakku assersuutigalugu meeqqanik sullississatut atorfinitsitaanngikkaluarpataluunniit. Tamatuma erseqqissumik nassataraa, inuit suliaminnut atatillugu aalajangersimasumik meeqqat ornittagaanniittartut aammattaaq meeqqanik pinerliisimanginnermut uppersaammik piniunneqassammata

Taamaalilluni pineqartoq tassaavoq annertunerusumik meeqqanik illersuinissaq.

Tunngaviit taakku tunngavigalugit aammattaaq siunnersuutigineqarpoq, inuit assersuutigalugu angerlarsimaffimmi paarsisartunik angajoqqaarsianilluunniit illoqateqartut, tassuunakkullu meeqqanut paarineqartunut toqqaannartumik attaveqarsinnaasut, meeqqanik pinerliisimanginnermut uppersaammik piniunneqartassasut.

Naggasiullugu oqaatigineqassaaq, ullumikkutut meeqqanik pinerliisimanginnermut uppersaatinik aatsaat piniarneqarsinnaammat, inuk pineqartoq nammineerluni allakkatigut akuersisimappat.

Taama naatsumik oqaaseqarlunga siunnersuut Inatsisartunut suliarisassanngortippara.